



**REGULAMENTU BÁ KOMPETISAUN
LIGA FUTEBOL DE TIMOR-LESTE (LFTL)**



REGULAMENTU BA KOMPETISAUN LIGA FUTEBOL DE TIMOR-LESTE (LFTL)

KAPÍTULU I

DISPOZISAUN JERÁL

Artigu 1.º

Norma habilitante

(Organizasaun no funzionamentu)

Regulamentu ida ne'e adopta tuir Lei Númeru 1/2010, Ioron 21 fulan Abril artigu 27.º ne'ebé regula Lei Base ba Desportu, no artigu 39.º hosi 1ª Alterasaun Estatutu LFTL nian ne'ebé aprova hosi Assembleia Geral iha Ioron 24 fulan-Outubro 2020.

Artigu 2.º

Definisaun

Regulamentu ida ne'e nia efeitu ka aplikasaun sira mak hanesan tuir mai ne'e:

- a) «Ajente desportivu», klubu nia dirijente no funzionárius, traballadores no kolaboradores, jogadores, treinadores, auxiliares ténikus, árbitrus, delegadus ba Liga, ajentes hosi forsa seguransa pública nian no responsável ba seguransas, asistentes ba resintu desportivu, médikus, masajistas, bombeirus, makeirus, enfermeirus no pessoal ne'ebé fó asisténsia médica no protesaun sívil, apaña-bolas, membru hosi komunikasaun sosiál hothotu, no ema ne'ebé iha, ka, hala'o kna'ar no hetan akreditasaun, nune'e mós ba membru sira hosi órgaun sosiál no órgaun hosi Federasaun Futebol Timor-Leste no LFTL nian;
- b) «Anel seguransa» fatin ka área ne'ebé forsa seguransa sira defini, iha resintu (fatin) desportivu laran no liur, ne'ebé uza ba montajem no instalasaun entidade organizadora ba jogu nian, hodi garante seguransa;
- c) «Asistente ba resintu desportivu», ka, «ARD» ("steward"), tékniku seguransa ne'ebé, kontratadu direta ka indiretamente hosi entidade ne'ebé organiza jogu, ninia funzionáriu, voluntáriu, ho akreditasaun, ne'ebé iha responsabilidade entidade organizadora jogu nian, ho kna'ar ba hala'o manutensaun seguransa, no seguransa privadu ba resintu eventu desportivu iha kompetisaun Liga nian;



- d) «Klubu» asosiasaun ne’ebé reprezenta ekipa suplementar sira, ho modalidade oin-oin no eskalaun keta-ketak, karik iha;
- e) «Klubu uma nain» klubu promotor ba espetáculo desportivu, ne’ebé simu ekipa bainaka, ba jogu ne’ebé organiza rasik ka ho LFTL nia apoiu;
- f) «Komplexu desportivu» área, konstrusaun ka instalasaun sira ne’ebé destinadu ba práтика desportiva ba modalidade ida ka liuhosi modalidade ida, hahú hosi fatin ne’ebé rezervadu ba públiku to’o ba kareta para fatin;
- g) «Koordenador seguransa nian» ema ne’ebé dezignadu hosi LFTL nu’udar responsável operasional ba seguransa iha resintu desportivu no anéis seguransa nian, iha kooperasaun ho entidade seluk ne’ebé hola fatin, karik iha, hodi garante seguransa durante espetáculo desportivu la’o;
- h) «Klubu nia dirijente sira» titular sira hosi órgaun sosiál, ida-idak ho nia diretor no funzionáriu sira seluk ka kolaborador sira ne’ebé, hala’o kna’ar iha diresaun, xefia ka koordenasaun iha estrutura orgánika ida-idak, no mós mandatáriu sira hosi klubu ida-idak;
- i) «Especáculo desportivu» eventu tomak ne’ebé bele realiza jogu ofisiál, hahú ho abertura to’o enserramentu resintu desportivu nian;
- j) «Estádiu» resintu desportivu destinadu ba práтика futebol, ne’ebé ho muru ka rede haleu, tuir regra ho asesu kontroladu ka kondisionadu;
- k) «Estádiu neutru» fatin ida ne’ebé mak sei hala’o jogu ofisiál, fatin ida ne’ebé sei indika hosi orgaun ezekutivu LFTL nian;
- l) «Funzionáriu» emar ne’ebé kaer kna’ar iha klubu ka iha LFTL, sei halo nia kna’ar tuir deit lei no imparsial;
- m) «Jogu ofisiál» jogu hirak ne’ebé sei hala’o hosi orgaun Ezekutivu LFTL;
- n) «Lei Jogu nian» norma sira ne’ebé mak regula jogu futebol, aprovadu hosi *International Football Association Board* tuir ámbitu ne’ebé aplika hosi FIFA – Federasaun Internasional ba Futebol Asosiadu;
- o) «Patrosinador ofisiál» patrosinador ka patrosinadores sira ne’ebé hetan direitu ba denominasaun (naran) ida ne’e, hosi kompetisaun ne’ebé Orgaun LFTL organiza (*naming sponsor*);
- p) «Retângulu jogu nian» fatin ne’ebé jogu futebol hala’o, tuir Regra jogu futebol nian;



- q) «Terenu jogu» fatin ne'ebé mak hala'o kompetisaun, ho zona protesaun sira ne'ebé defini iha regulamentu internasional futebol nian;
- r) «Títulu ingressu» billete, kartaun, konvite ka dokumentu ne'ebé mak fó fatin atu asesu ba iha fatin desportivu.

Artigu 3.^o

Objetivu

1. Regulamentu ne'e abranje ba klubu hotu, atu labele iha ekipa rua iha klubu ne'e nia laran hodi Partisipa ba kompetisaun hanesan.
2. Regulamentu ida ne'e atribui kompeténsia ba Orgaun Ezekutivu LFTL nu'udar realizadór ba LFTL.
3. Sekretariadu Ezekutivu, bele delega ninia kompeténsia ne'ebé deit mak iha Regulamentu ida ne'e, ba ninia membru ruma, dirijente sira ka funsionáriu ne'ebé kualifikadu iha serbisu LFTL nian, la iha prejuízu ba saida mak iha número sira tuir mai.
4. Biar iha kazu delegasaun kompeténsia, Prezidente LFTL bele, bainhira deit haree katak konveniente liu ka nesesáriu, entrega fila kna'ar no kompeténsia ne'e ba Sekretariadu Ezekutivu ka ba nia a'an rasik.
5. Iha kazu sira delegasaun kompeténsia nian, kompete ba delegadu atu hatene kona-ba reklamasau sira ne'ebé mosu, hosi desizaun nia hasai, la-fó prejuízu ba saida mak hateten sai iha número sira iha leten.

Artigu 4.^o

Époka desportiva

1. Époka desportiva ba kompetisaun sira ne'ebé LFTL organiza, sei hahú ~~hosí loren~~ 15 iha fulan-Marsu (ba oin) 2021, no sei hotu iha 30 Novembru 2021.
2. LFTL organiza Liga Juvenil, termina kalendáriu tuir kompetisaun hosi 1^a Divizaun no 2^a Divizaun sira.
3. LFTL organiza kompetisaun bá 3^a Divizaun kada tinan-rua (2) dala ida.
4. Bainhira hasoru difikuldades bo'ot ka tanba situasaun exepcionál ruma, ne'ebé justifika, Sekretariadu Ezekutivu LFTL bele prolonga termu ba époka desportiva, suspende total ka parsialmente kompetisaun ofisiál ne'ebé LFTL organiza.



Artigu 5.^º

Suspensaun anual

1. Durante períodu suspensaun anual (feriadu), hahú tinan-tinan hosi loron 1 Dezembru to'o loron 28 Fevereiru tinan tuir mai, Klubu sira bandu labele partisipa iha jogu ofisiál, bele deit partisipa iha jogu ofisiál karik iha kazu espesial ruma, no hetan autórizasaun hosi Sekretariadu Ezekutivu LFTL nian, ka previstu ona iha Regulamentu ida ne'e.
2. Iha Époka ida sei halo Suspensaun Semana ida depois de Jornada 14, antes atu kontinua ba Jornada 15, tempu ida ne'e iha possibilidade ba klubu sira atu halo transferénsia no halo inskrisaun ba Jogadores.

Artigu 6.^º

Atividade Ofisiál

Konsidera nu'udar atividade ofisiál, ida ne'ebé partisipa iha kompetisaun sira organizadu hosi LFTL, mak hanesan:

- a. 1^a Divizaun,
- b. 2^a Divizaun,
- c. Tasa 12 de Novembru,
- d. Super Tasa,
- e. Liga Juvenil
- f. 3^a Divizaun, no
- g. Prova sira seluk ne'ebé organiza hosi LFTL, ka hosi Federasaun Futebol Timor-Leste.

Artigu 7.^º

Kompetisaun nia Naran

1. Kompetisaun ne'ebé LFTL organiza, sei koordena hamutuk ho Federasaun Futebol Timor-Leste, mak hanesan tuir mai:
 - a. Kampeonatu 1^a Divizaun;
 - b. Kampeonatu 2^a Divizaun;



- c. Tasa 12 de Novembru;
 - d. Super Tasa;
 - e. Liga Juvenil;
 - f. Kampeonatu 3^a Divizaun.
2. LFTL bele, tuir ámbitu iha kontratu ho patrosinador sira, halo akordu ho entidade seluk (terseira pessoa), hili naran ofisiál ka naran ofisiál seluk ba kompetisaun sira ne'ebé temi iha número iha leten.

Artigu 8.^º

Obrigasaun atu Partisipa

- 1. Klubu sira ne'ebé admitidu partisipa iha kompetisaun sira hosi LFTL; 1^a Divizaun no 2^a Divizaun, iha obrigasaun atu partisipa mós iha Tasa 12 de Novembru, no bainhira hetan kualifikasaun, partisipa mós iha Super Tasa.
- 2. Klubu sira hosi 3^a Divizaun bainhira hetan kualifikasaun no promosaun tuir regras kompetisaun, eligivel partisipa kompetisaun 2^a Divizaun iha époka tuir mai.

Artigu 9.^º

Divulgasaun Naran ba Klubu nian

Sekretariadu Ezekutivu LFTL, tinan-tinan sei fó sai ka divulga klubu partisipante sira nia naran, tuir kompetisaun ida-idak ne'ebé temi iha número 1. Artigu 7.^º, la fó prejuízu ba kazu sira hosi klubu kandidatu ne'ebé sei hein (rekursu) desizaun hosi instânsia kompetente ba ordem desportiva, atu simu ka lae sira nia kandidatura.

Artigu 10.^º

Organizasaun Kompetisaun nian

- 1. Ba kompetisaun ida-idak sei hala'o tuir Norma Espesial ida ne'e, se karik la regula iha norma espesial ne'e, bele halo tuir norma jerál sira seluk.
- 2. Klubu sira iha obrigasaun atu kumpri nia dever ne'ebé mai hosi patrosinador sira ba iha kompetisaun ida-idak.



KAPÍTULU II

ORGANIZASAUN TÉKNIKA

Artigu 11.^º

Formatu ba Kompetisaun

1. Formatu ba kompetisaun mak hanesan, lakon sai (a eliminatoriu), tuir pontuasaun, mistu ka jogu úniku (ida deit) ba hetan prémio.
2. Ba tinan 2021, total klubu sira ne'ebé sei tuir kompetisaun iha 1^a Divizaun hamutuk klubu 10 no 2^a Divizaun mós hamutuk klubu 10.
3. Ba tinan 2021, klubu sira ne'ebé mak atu partisipa iha 1^a Divizaun LFTL kompostu klubu neen (6) hamutuk klubu rua (2) Primeiru klasifikadu hosi Grupu rua iha 2^a Divizaun ne'ebé LFA organiza iha époka da-5 tinan 2019.
4. LFTL sei termina kalendáriu ida hodi organiza jogu apuramentu (play-of), entre klubu rua (2) hosi 1^a Divizaun ne'ebé klasifika iha pozisaun 7 no 8 ho klubu rua (2) hosi 2^a Divizaun ne'ebé klasifika iha pozisaun da-ruak hosi Grupu rua ne'ebé LFA organiza iha époka da-5 tinan 2019.
5. Klubu rua manan-na'in iha jogu apuramentu (play of) sei completa total klubu 10 hodi partisipa iha 1^a Divizaun.
6. Bá tinan 2021, klubu sira ne'ebé mak atu partisipa iha 2^a Divizaun kompostu klubu rua (2) Primeiru klasifikadu Grupu ida-idak hosi 3^a Divizaun ne'ebé LFA organiza iha époka da-5 tinan 2019, atu completa total klubu 10 iha 2^a Divizaun.

Artigu 12.^º

Kompetisaun Lakon-Sai (Eliminatória)

1. Tasa 12 de Novembru, nu'udar kompetisaun ida ne'ebé LFTL organiza, ho modelu kompetisaun lakon-sai (a eliminar), prova ida ne'ebé sei realiza tuir faze ka tuir eliminatória; Klubu ne'ebé lakon sai, tuir faze ida-idak to'o hetan finalista na'in-rua.
2. Faze ka eliminatória sira bele hala'o ho jogu 2 (rua), iha klubu ida-idak nia kampu, ka bele mós halo jogu ida deit, tuir sorteiu (dada rifa) ka iha kampu neutru, tuir regulamentu ne'ebé LFTL defini ba kompetisaun ida-idak.



Artigu 13.^o

Kompetisaun sura Pontu

1. Kompetisaun ofisiál sira ne'ebé sura tuir pontus hala'o jogu dala-rua, ne'ebé klubu sira hotu sei joga hasoru malu dala-rua, dala-ida nu'udar uma nain, dala-ida nu'udar bainaka; no Órgaun Ezekutivu Liga nian deit mak bele autórliza atu troka fatin jogu (Estadio).
2. Bainhira klubu sira ne'ebé inskritu ona iha kompetisaun futebol nian, ne'ebé LFTL organiza, la iha estádiu ka kampu rasik ba realiza sira nia jogu nu'udar uma nain, mak organismu LFTL nian ne'ebé iha kbi'it, mak sei determina estádiu ka kampu ne'ebé atu realiza jogu sira ne'e.
3. Iha kompetisaun ne'ebé disputa sura tuir pontu, sei adopta sistema sura hanesan iha tabela tuir mai:
 - a. Manan, pontu tolu (3);
 - b. Empata, pontu ida (1);
 - c. Lakon, la hetan pontu (0).
4. Falta komparénsia ka bainhira klubu ida la tuir jogu ofisiál ne'ebé marka ona, mak tuir regulamentu disciplinar, klubu ne'ebé marka prezensa hetan pontu tolu (3) ka hakat liu faze, no klubu ida ne'ebé falta la hetan pontu (0) ka hetan eliminasaun, depende ba modalidade kompetisaun.
5. Ekipa arbitrajen ka Delegado Liga nian ba iha jogu refere mak iha kbi'it determina falta komparénsia.

Artigu 14.^o

Dezempage bainhira pontu hanesan

1. Hodi defini klasifikasioun jerál klubu sira nian, bainhira kompetisaun sura pontu remata, mak klubu sira hetan pontu hanesan, sei aplika uluk nu'udar efeitu dezempate ho nia kritériu hanesan tuir mai:
 - a. Klubu ne'ebé manan jogu dala barak liu iha kompetisaun laran;
 - b. Diferensa hosi número golu ne'ebé klubu sira hatama no número golu ne'ebé klubu sira sofre, iha jogu hothotu kompetisaun tomak nian;
 - c. Klubu ne'ebé hatama golu barak liu iha kompetisaun laran.



- d. Númeru pontuasaun ne'ebé hetan hosi klubu sira ne'ebé iha situasaun empate, iha jogu sira hala'o hasoru malu (head to head);
2. Bainhira aplika kritéria hirak ne'e hotu mak nafatin empata, sei haree kritériu dezempate seluk hanesan tuir mai:
 - a) Bainhira klubu rua deit mak empatadu hela:
 - i. Realiza jogu ida iha estádiu neutru, ne'ebé sei hatudu hosi Sekretariadu Ezekutivu Liga nian;
 - ii. Karik jogu remata mak sei empatadu nafatin, sei hala'o prolongamentu ho minutu 30, fahe ba parte rua ho minutu 15 parte ida;
 - iii. Karik prolongamentu hotu, nafatin hetan situasaun empate, mak sei tiru penaltu hodi hetan manan nain, tuir saida mak previstu ona iha Lei Jugu nian;
 - b) Bainhira situasaun empate liuhosi klubu rua maka:
 - i. Sei realiza kompetisaun foun ho klubu hirak ne'ebé iha situasaun empate, joga dala-ida deit hasoru malu iha kampu neutru, hodi hetan manan nain;
 - ii. Maka remata kompetisaun ida ne'e nafatin la hetan dezempate, no ekipa rua ka liuhosi rua mak empatadu nafatin, sei dezempata liuhosi kritériu ne'ebé fixa iha númeru 1. Artigu 14.º.
3. Hodi estabelese klasifikasaun klubu sira nian iha jornada ida-idak, ba efeitu dezempate nian sei aplika kritériu sira ne'ebé previstu iha alínea a), b) no c) hosi númeru 1. Artigu 14.º.
4. Tuir saida mak previstu ona iha númeru 3. Artigu 14.º, bainhira aplika kritériu sira ne'e hotu, mak klubu rua ka liuhosi rua nafatin hetan situasaun empate, sei atribui pozisaun hanesan ba klubu hirak ne'e iha tabela klasifikativa.

Artigu 15.º

Kompetisaun sira ho Jugu ida deit ba hetan Prémiu

1. Super Tasa mak kompetisaun ne'ebé LFTL organiza, ho atribuisaun prémiu liuhosi jogu ida deit iha kampu neutru, entre manan na'in hosi 1ª Divizaun iha kampeonatu, ho manan na'in Tasa 12 de Novembru nian, (iae ho Finalista ne'ebé lakon Tasa 12 de Novembru bainhira manan na'in hanesan).



2. Jugu Super Tasa mak kompetisaun ikus ne'ebé realiza bainhira remata époka desportiva ida, no molok époka desportiva foun hahú, tuir kalendáriu ne'ebé LFTL defini.

Artigu 16.^º

Ordem ba jogu iha kompetisaun Ofisiál sira

Ordem jogu ba kompetisaun ofisiál sira, defini liuhosi sorteiu, ne'ebé Sekretariadu Ezekutivu LFTL nian sei realiza, ho prezensa hosi klubu partisipante hothotu.

Artigu 17.^º

Ekipa sira nia kompozisaun

1. Klubu sira tenki dezigna ba jogu ida-idak suplente na'in hitu (7) ne'ebé bele halo substitusaun durante jogu laran, la haree ba sira nia pozisaun, ka sira be atu troka ne lezionadu ka lae.
2. Jogadór sira ne'ebé substituídu (troka) ona labele tama fali ba retângulu jogu nian.
3. Klubu sira tenki entrega fixa téknika jogadór sira nian, ba ekipa arbitrajen no ba Delegadu hosi Liga, hodi halo kontrolu ba jogadór sira ne'ebé inskritu.
4. Klubu sira bele hili ba jogu ida jogadór estranjeiru na'in-lima, maibé iha kampu laran labele uza liuhosi jogadór estranjeiru na'in-tolu.
5. Ba jogu sira ne'ebé anuladu, ka haruka repete fali tanba protestu sira ne'ebé deside ona, mak iha fixa téknika bele inklui deit jogadór sira ne'ebé iha kondisaun hanesan iha loron ne'ebé jogu interrompe.
6. Jogadór sira ne'ebé mak iha jogu interrompidu, kumpri hela kastigu no labele joga iha loron ne'e, labele mós tama fali iha fixa téknika ba jogu ne'ebé atu repete fali.
7. Karik atu muda loron ba jogu ruma, klubu sira bele inklui deit iha fixa téknika jogu nian, jogadór sira ne'ebé inskritu tuir regulamentu no loron ne'ebé determina ona.
8. Karik deside ona, marka loron foun ba jogu ne'ebé interrompidu, sei aplika regra sira hanesan tuir mai:
 - a. Fixa téknika bele altera ka muda, hodi inklui fali jogadór seluk ne'ebé inskritu tuir regulamentu iha loron jogu interrompidu nian;



- b. Jogadór sira ne'ebé substituídu ona ka expulsu durante jogu ne'ebé interrompidu, no sira ne'ebé hetan sansaun disciplinar, labele joga fali;
- c. Jogadór sira ne'ebé iha kampu laran bainhira jogu ne'e interrompe, labele inklui iha fixa téknika nu'udar suplente iha jogu ne'ebé atu repete fali.
- d. Punisaun ne'ebé Jogadór sira hetan bainhira jogu interrompe (teri-netik), kontinua vale ba restu hosi tempu jogu foun nian;
- e. Jogadór sira ne'ebé hetan kartaun mean (expulsu ona) iha jogu ne'ebé interrompe (teri-netik), labele atu troka fali, no número jogadór sira ba jogu foun sei hanesan ho número jogadór sira bainhira jogu interrompe (teri-netik);
- f. Biar (mezmu) jogadór ida hetan suspensaun iha jogu ruma liu tiha loran jogu interrompe nian, bele inklui iha fixa téknika ba jogu ne'ebé atu repete;
- g. Ekipa sira bele halo substituisaun, tuir número ne'ebé iha direitu bainhira jogu interrompe;
- h. Jogu sei hahú hikas iha fatin kampu nian hanesan bainhira jogu interrompe (livre, pontapé baliza, pontapé kantu, s.s.t.);
- i. Karik jogu interrompe ho bola moris hela, mak sei hahú fali ho lansamentu bola ba rai iha fatin hanesan.

KAPÍTULU III

JOGU

Artigu 18.^º

Lei Jugu nian

- 1. Jugu sira nia disputa sei halo tuir deit ba lei Jugu ne'e nian, no lei ne'ebé aprovadu hosi International Football Association Board (IFAB) no instituisaun seluk ho vinkulu hosi institusaun ida ne'e, ka hosi Fédération Internationale de Football Associée (FIFA).
- 2. Alterasaun ba Lei Jugu nian ho diretiva sira hanesan temi iha leten, sei vinkula bainhira Federasaun Futebol Timor-Leste divulga, liuhosi komunikadu ofisiál.

Artigu 19.^º



Durasaun Jugu

1. Jugu sira ba kompetisaun ofisiál tuir pontuasaun, iha durasaun minutu 90, fahe ba parte rua ho durasaun tempu hanesan, ho intervalu minutu 15.
2. Tasa 12 Novemburu, sei realiza tuir regulamentu ida ne'e.
3. Ba faze ka eliminatória sira ne'ebé tuir sorteiu, ba jogu dala-ida deit entre ekipa rua, sei aplika regra sira ne'ebé determina ba Super Tasa.
4. Ba faze ka eliminatória sira ne'ebé realiza ho jogu rua, iha ekipa ida-idak nia kampu, mak eliminatoria hatudu empate ho golu hatama no sofre hanesan, sei vale nu'udar primeiru kritériu ba dezempate, golu barak liu ne'ebé hatama hosi ekipa iha kualidade bainaka.
5. Bainhira kritériu ba dezempate hanesan temi iha número iha leten labele determina manan nain, sei aplika regra sira ba dezempate ne'ebé regula ba iha Super Tasa.
6. Super Tasa sei realiza jogu ida ho minutu 90, iha parte rua ho minutu 45 ho intervalu minutu 15, no bele prolonga tan, karik liu tiha tempu regulamentar rezultadu nafatin empata, mak sei halo prolongamentu ida ho durasaun minutu 30, la iha intervalu maibé troka kampu molok remata minutu 15.
7. Karik liu tiha prolongamentu mak empata nafatin, sei realiza dezempate liuhosi tiru penaltu, ho ekipa ida ho direitu ba penaltu lima (5), ida tiha ida fali, no ekipa ne'ebé hetan vantagem iha tiru penaltu lima mak sai manan nain.
8. Karik tiru penaltu lima hotu mak nafatin empata, ekipa ida-idak sei tiru penaltu nafatin, ida tiha-ida fali, to'o ekipa ida hetan vantagem no sai manan nain.
9. Karik mosu situasaun ruma ne'ebé la prevee explicitamente iha artigu 19.º, sei rekore ba Delegadu Liga nian.
10. Tamba situasaun exepçional ba Liga Juvenil, sei regula Kompetisaun ofisiál tuir pontusaun, durasaun tempu konforme regulamentu jogu aplika, banati tuir mós pontu 3 to'o 9 hosi Artigu 19.º.

Artigu 20.º

Kalendáriu

1. LFTL mak sei estabelese kalendáriu, iha koordenasaun ho Federasaun Futebol Timor-Leste (FFTL), loran ba prova ofisiál sira, inklui jogu sira ne'ebé sura ba kompetisaun



internasionál klubu sira, karik iha, no ba Selesaun Nasionál sira, hodi garante katak kalendáriu ba jogu sira iha prova keta-ketak, sei la monu iha loron hanesan.

2. Jogu sira ne'ebé adia ka muda, organismu kompetente LFTL, iha koordenasaun ho klubu ida-idak, mak sei marka hikas loron no fatin ba jogu refere.

Artigu 21.^o

Kalendáriu no oráriu jogu

1. Sekretariadu Ezekutivu LFTL mak sei promove sorteiu ba kompetisaun ida-idak, no fó hatene ba klubu sira hototu, kona-ba kalendáriu ho loron, oras no fatin hala'o jogu.
2. LFTL mak bele deside, karik klubu ruma husu no hetan konkordánsia ho klubu seluk, atu altera loron no oráriu ba sira nia jogu.

Artigu 22.^o

Adiamentu tanba alterasaun ba Estádiu no kazu seluk

1. Karik tanba Força Maior ruma, haree katak jogu labele hala'o, atu hahú ka atu remata, LFTL mak sei defini iha konkordánsia ho klubu sira, loron foun ida ba hala'o hikas jogu refere.
2. Karik iha jogu ruma mak labele remata no la iha influénsia hosi klubu sira ne'ebé joga hela, tempu ne'ebé sei falta atu joga, sei halo hotu ho rezultadu hanesan iha momentu interrupsaun, iha prazu ne'ebé previstu iha número 1.
3. Bainhira jogu ida la remata tanba klubu ka adeptu sira ruma nia atitude, mak LFTL, iha koordenasaun no rona tiha ekipa arbitrajen, sei deside hanesan tuir mai:
 - a) Repete hikas jogu tomak (minutu 90), tuir loron ne'ebé sei dezigna;
 - b) Anulasaun ba jogu hodi atribui vitória (manan) ba ekipa ne'ebé la iha kulpa;
 - c) Jogu sei hahú fali tuir tempu ne'ebé sei falta, iha loron ne'ebé LFTL sei determina.

Artigu 23.^o

Jogu sira anuladu no haruka repete fali



Jogu sira ne'ebé mak anuladu ka haruka repete fali, ho motivu protestu ne'ebé deside ona, jogu sei repete hikas iha estádiu ne'ebé hala'o dahuluk, karik tanba situasaun téknika LFTL bele deside oin seluk.

Artigu 24.^º

Atrazu hosi Ekipa no Interrupsaun

1. Bainhira iha atrazu (komparénsia) hosi ekipa ruma ba oras ne'ebé marka ona atu hahú jogu, tanba faktu sira ne'ebé la'os sala hosi klubu, tenki hein nafatin ekipa ne'e to'o oras ne'ebé jogu sei bele realiza.
2. To'o oras ida ne'ebé árbitru deklara katak labele ona realiza jogu tanba ekipa ne'ebé atraza labele to'o iha fatin joga, mak sei deklara falta komparénsia ba ekipa ne'ebé atraza no fó vitória ba ekipa ne'ebé hola fatin iha kampu laran, no karik iha razaun ka motivu bo'ot ruma mak determina, LFTL bele aseita repetisaun ba jogu refere.
3. Bainhira iha interrupsaun ba jogu, tanba Força Maior ruma ka tanba protestu maka'as hosi klubu sira, ka hetan invazaun kampu hosi adeptu sira, ekipa arbitrajen iha kordenasaun ho LFTL nia delegadu bele deside interrompe kendas jogu refere.
4. Iha kazu interrupsaun jogu ne'ebé previstu iha número 3. Konsellu Jurisdicinal LFTL nian, mak sei fó desizaun tuir regulamentu haruka.

Artigu 25.^º

Klubu sira nia Dever Jerál

1. Kompete ba klubu sira no ba LFTL, atu asegura manutensaun ba ordem no disciplina iha resintu desportivu no iha anel ka perímetro seguransa nian, antes, durante no depois jogu ne'e hala'o.
2. Pessoal ka ajente sira ne'ebé hola parte iha LFTL no mós iha klubu uma na'in nian, mak sei hola kna'ar atu halo kontrolu, vizilânsia, akompañamentu atu indika fatin ba públiku, hodi asegura trankuilidade no ordem públika.

Artigu 26.^º

Klubu nia Dever Espesífiku



Klubu uma na'in ho delegadu Liga sira nia never espesial, mak hanesan tuir mai:

- a. Klubu uma na'in no delegadu jogu sira nia responsabilidade atu simu ekipa arbitrajen no fó asisténsia ne'ebé presiza hosi jogu hahú to'o remata;
- b. Klubu uma na'in no delegadu jogu sira nia responsabilidade atu simu ekipa bainaka no fó asisténsia ne'ebé presiza hosi jogu hahú to'o remata;
- c. Autórizasaun atu halo gravasaun ba jogu, nu'udar Liga ninia responsabilidade;

Artigu 27.^º

Dever koresaun no urbanidade interveniente sira nian

1. Dirijentes, delegadus, jogadores, téknikus no funzionárius, iha never atu hatudu komportamentu urbanidade no koresaun ba sira rasik, no mós ba reprezentantes LFTL, Federasaun no árbitrus.
2. Iha instalasaun desportiva nia laran iha ne'ebé jogu hala'o, jogadores no téknikus, ekipa arbitrajen, dirijentes no funzionárius hosi klubu ida-idak, iha never atu hatudu hahalok diak, respeitu ba malu no ba públiku, ba elementus hosi forsa seguransa nian no reprezentantes hosi órgaun komunikasaun sosiál.
3. Arbitrus iha never atu kontribui no kaer sira nia kna'ar, promove relasaun ne'ebé diak ho interveniente hothotu jogu nian.

Artigu 28.^º

Klubu sira nia Delegadu

1. Klubu sira sei dezigna ninia delegadu ida ba jogu ida, akreditadu hosi Liga, atu marka prezensa iha jogu hothotu, hodi akompaña evolusaun jogu, garante ekipa nia partisipasaun regular, no kolabora ho Delegadu Liga nian hodi asegura prosedimentus hotu ne'ebé presiza durante eventu desportivu la'o.
2. Delegadus hosi klubu ida-idak tenki apresenta klubu nia fixa téknika ho identifikasaun jogadores efetivu no suplentes, naran no apelidu, número kamizola, no kartaun jogadór ba Delegadu Liga nian, mínimu oras ida ho balu molok jogu hahú.
3. Fixa téknika tenki iha mós identifikasaun jogadór ne'ebé hala'o kna'ar hanesan kapitaun no sub-kapitaun ekipa.



4. Liga nia Delegadu mak hakerek buletim ho konstitusaun hosi ekipa sira, tuir modelu ka formatu ne'ebé Liga sei fó, ne'ebé sei fahe ba delegadu hosi klubu sira ba halo validasaun data, ho sira nia asinatura iha dokumentu ne'e.
5. Delegadu hosi klubu ida-idak tenki komparese iha estádiu molok jogu atu hahú, hodi apresenta a'an ba árbitru no ba Liga ninia Delegadu.
6. Delegadu klubu nian mak sai nu'udar responsável no representante klubu ba lala'ok tomak iha relasaun ho jogu.
7. Delegadu Klubu ka nia substitutu, hamutuk ho Liga nia Delegadu, nia never mak hanesan tuir mai ne'e:
 - a) Delegadu ka nia substitutu mak reprezenta klubu uma nain, prepara fatin jogu tuir regulametu Jogu, no diretiva sira ne'ebé aplika hosi IFAB ka hosi FIFA;
 - b) Proibi emar ne'ebé la hetan autórizasaun atu tama ka hela iha fatin jogu nian no iha fatin sira halo ligasaun ho – balneárius/kampu jogu;
 - c) Koordena ho entidade sira ne'ebé kompetente hodi hola medida prevensaun ne'ebé presiza no adekuadu liu, hodi asegura ordem no trankuilidade iha resintu jogu nian;
 - d) Organiza no superviziona, ba asesu sirkulasaun no exersísiu funsaun hosi Média no Komunikasaun Sosiál;
 - e) Rekruta no Koordena Pessoal ba hala'o kna'ar nu'udar apaña-bola (hili bola);
 - f) Garante lalok normal ba eventu tuir termus Regulamentu ne'e nian.

Artigu 29.^º

Kapitaun Ekipa

1. Kapitaun ekipa, jogadór ne'ebé kualifikadu reprezenta ekipa hodi ko'alia ho ekipa arbitrajen, husu esklaresimentu kona-ba lala'ok jogu nian.
2. Dever Kapitaun Ekipa nian:
 - a. Respeita no halo respeita árbitru sira nia desizaun;
 - b. Observa no hatudu norma lealdade no koresaun ho komportamentu exemplar, ba ho jogadores seluk iha jogu laran;



Artigu 30.º

Asesu no Permanénsia iha Resintu jogu no iha Balneáriu

1. Jogadores ho ekipa arbitrajen deit mak bele okupa Resintu jogu nian.
2. Treinadores, jogadores suplente no ekipa téknika ne'ebé presente mak bele hola fatin iha banku suplente sira nian, no labele tama iha retângulu jogu bainhira la hetan autórizasaun hosi árbitru.
3. Ekipa sira, funzionários ne'ebé hetan akreditasaun hosi klubu rua, Liga nia delegadu no entidade sira hosi Liga no árbitrus deit, mak bele asesu ba resintu jogu nian, ba retângulu jogu no ba iha balneáriu sira.
4. Komunikasaun sosiál iha asesu ba zona resintu jogu nian no zona mista sira, iha konfraternizasaun ho ekipa sira molok jogu hahú no remata.
5. Pessoal seguransa, médikus, hosi protesaun sivíl no entidade sira seluk ho responsabilidade ba seguransa no kualidade ba eventu, bele asesu, tuir sira nia kna'ar iha zona resintu jogu nian, asesu ba resintu desportivu, zona konfraternizasaun nian no ba balneáriu sira.

Artigu 31.º

Banku Suplente nia Kompozisaun

Bele tu'ur iha banku suplente sira nian, durante tempu regulamentar, tuir kondisaun fatin, máximu liu:

- a. Delegadu Klubu, karik hakarak;
- b. Treinadór na'in-rua (prinsipal ho adjuntu);
- c. Médiku, masajista ka profisional saúde nian, karik iha;
- d. Jogadór suplente na'in-hitu.

Artigu 32.º

Komunikasaun Sosiál

1. Komunikasaun sosiál ne'ebé atu marka prezensa iha jogu ida-idak, tenki hetan uluk autórizasaun hosi Liga nia Delegadu hodi bele partisipa iha eventu refere.



2. Komunikasaun sosiál ne'ebé hetan akreditasaun bele husu ba delegadu hosi klubu sira no Liga hodi prepara no determina fatin ida ba Konferénsia Imprensa bainhira jogu remata.

Artigu 33.^o

Liga nia Delegadu

1. Liga sei dezigna Delegadu ida ba jogu ida.
2. Delegadu Liga ninia kompeténsia:
 - a. Hamutuk ho árbitru verifika kondisaun téknika kampu nian;
 - b. Garante no fiskaliza kumprimentu ba normas regulamentares, no relata ba Liga karik verifika iregularidade ruma;
 - c. Elabora no remete relatóriu akontesimentu sira ne'ebé iha relasaun ho jogu ba Liga.

Artigu 34.^o

Ekipa Arbitrajen

1. Ekipa arbitrajen sira ba jogu ida-idak, kompostu hosi árbitru kampu na'in-ida, fiskal-liña na'in-rua, no árbitru suplente ida.
2. Ba jogu ida-idak Konsellu Arbitrajen, iha koordenasaun ho Sekretariadu Ezekutivu, mak sei dezigna ekipa arbitrajen ba jogu ida.
3. Karik ekipa arbitrajen mak la kompletu, árbitru labele hahú ka hatutan lala'ok jogu, tenki buka substitui elementu ka elementu sira ne'ebé sei falta, tuir saida mak estabelese ona iha Regulamentu Arbitrajen nian.

KAPÍTULU IV

EKIPAMENTU SIRA

Artigo 35.^o

Ekipamento nia Kor



1. Klubu sira tenki hatama uluk ona ba Liga, imajen hosi ekipamentu sira ba guarda-redes no mós ba jogadór sira iha kampu laran.
2. Bainhira ekipa rua nia ekipamentu hanesan, ekipa Bainaka iha obrigasaun atu uza ekipamentu suplente, hodi distingue jogadór sira iha kampu laran.

Artigu 36.^º

Numerasaun ba Kamizola no ba Kalsaun Jogadór sira nian

1. Kamizola no kalsaun jogadór sira nian iha obrigasaun atu tau número tuir regra sira hanesan tuir mai ne'e:
 - a) Numerasaun ba kamizola sira tau iha kotuk hodi ema bele haree moos, ho kór la hanesan ho kamizola nia kór;
 - b) Numerasaun ba kalsaun sira fakultativu, la'os obrigatóriu;
 - c) Jogadór ida hosi klubu ida-idak nia número kamizola nafatin no labele troka durante époka tomak, tuir informasaun plantel ne'ebé klubu sira hatama ba Liga molok kompetisaun hahú;
 - d) Ba jogadór sira ne'ebé inskreve iha época nia klaran, número ba kamizola sei atribui bainhira halo prosesu rejistru iha Liga;
 - e) La sura ho número 1. ne'ebé esklusivu lo'os deit ba guarda-rede sira, número sira seluk bele atribui ba jogadór sira seluk;
 - f) Iha autórizasaun ba hakerek jogadór nia naran iha kamizola kotuk.

Artigu 37.^º

Publisidade iha Ekipamentu

1. Ekipa sira ne'ebé partisipa iha kompetisaun Liga, hetan autórizasaun atu uza publisidade liuhosi patrosinador ida, iha jogadór sira nia ekipamentu.
2. Klubu sira bele, durante época desportiva nia laran, modifika ka troka publisidade iha sira nia ekipamentu.

Artigu 38.^º



Emblema Ofisiál

1. Klubu sira iha obrigasaun atu uza sira nia emblema ofisiál, bele ida deit, iha kamizola, kalsau ka meias sira.
2. Bele tau klubu nia naran ofisiál, no mós inskrisaun seluk ne'ebé hatudu título nu'udar kampiaun.
3. Klubu sira iha obrigasaun atu tau Liga nia logo tipu iha kamizola nia liman sorin lo'os (*suku ka estampadu*).

KAPÍTULU V JOGADORES

SEKSAUN I

Partisipasaun no inskrisaun

Artigu 39.^º

Jogadores nia Partisipasaun iha Kompetisaun Ofisiál

1. Partisipasaun jogadores iha kompetisaun ofisiál sira ne'ebé Liga organiza, depende ba inskrisaun no rejistru dahuluk iha Liga, no iha FFTL liuhosi Liga.
2. Jogadores hosi klubu ne'ebé partisipa iha kompetisaun ofisiál ne'ebé Liga organiza, bele estabelese Akordu ba Prátika Desportiva ho Klubo; ho valór remuneratóriu ka prémio ba jogu, tuir número jogu ne'ebé partisipa, tanba empate ka manan ho ajuda ba kustu sira seluk.

Artigu 40.^º

Inskrisaun

1. Prosesu inskrisaun no transferénsia jogadores hosi klubu ne'ebé partisipa iha Kompetisaun Liga, ba rejistru sira nia inskrisaun, halo alterasaun ruma, mudansa ka revogasaun no hakotu akordu, tenki halo liuhosi Liga, ho normas ne'ebé estabelese iha número sira tuir mai.
2. Ho efeitu ba dispostu iha número 1. Artigu 40.^º, Liga sei remete listajen atualizadu ho jogadores nia naran, ne'ebé rejistru sira nia kontratu ho klubu sira ba FFTL.



3. Pedidu inskrisaun tenki hatama ho dokumentu sira hanesan tuir mai:
 - a. Akordu Prática Desportiva (kontratu) entre Klubu ho Jogadór, ne’ebé tenki refere karik iha atribuisaun valór remuneratóriu ka ajuda ba kustu, partisipasaun iha jogu ka durasaun maximu ba kontratu, karik iha;
 - b. Dokumentu komprobativu (atestadu médiwu) ba aptidaun fizika jogadores;
 - c. Kartaun eleitorál no Billete Identidade ka Passaporte nia fotokópia legalizadu;
 - d. Fotografia ho medida “3X4” koloridu ida, hakerek naran ho apelidu iha kotuk;
 - e. Idade mínimu ba prática desportiva iha kompetisaun ofisiál Liga nian, ne’ebé konsagra ona iha Regulamentu ida ne’e mak tinan 17. Bainhira Liga organiza no hala’o kompetisaun desportiva ba idade ki’ik liu tinan 17 (Junior, Juvenil, Inisiadu no Infantil), mak idade partisipasaun sei defini iha eskalaun tuir idade).
4. Ba jogadores Estranjeirus sei aplika regra sira ne’ebé konsagradu iha leten.
5. Klubu ida bele inskreve maximu liu Jogadór Estranjeiru na'in-lima (5). Entre sira na'in-lima ne'e, klubu iha obrigasaun utiliza jogadór Asia na'in-ida. Nune'e, iha momentu jogu ofisiál ne’ebé Liga organiza somente iha jogadór estranjeiru na'in-tolu iha kampu laran.
6. Prosesu inskrisaun tenki dirije ba Liga tuir guia no modelu ne’ebé sei fornese hosi Liga, iha ne’ebá tenki hakerek Klubu nia naran, Klubu nia número kódigu iha FFTL no iha Liga, Jogadores nia naran kompletu ho naran ne’ebé baibain bolu iha sira nia profisaun, no asinatura hosi klubu nia reprezentante.
7. Komprova hotu tiha prosesu inskrisaun katak la iha irregularidade ruma, hafoin Liga simu inskrisaun, no hatama kópia prosesu original ba FFTL.
8. Liga mak sei define no anunsia prazu ba inskrisaun jogadór sira nian.
9. Iha époka ida remata, jogadór bele hakotu kontratu ba prática desportiva ho klubu, hodi selebra kontratu ba prática desportiva ho klubu seluk, tuir dispozisaun sira ne’ebé iha Regulamentu ida ne'e.
10. Karik kontratu desportivu entre Klubu ho jogadór mak naruk liuhosi époka desportiva ida, klubu mak sei estabelese folin ka valór ba kompensasaun ba jogadór nia transferénsia, ne’ebé labele bo’ot liuhosi folin ka valór total hosi título remunerasaun nian, partisipasaun iha jogu ka ajuda kustu ba époka desportiva ida nian.
11. Ba jogadores ne’ebé la hetan remunerasaun ho ajuda kustu ka kompensasaun ruma ba partisipasaun iha jogu, livre atu hakotu kontratu ho Klubu bainhira époka desportiva ida remata.



12. Klubu ne'ebé mak la kumpre rekizitu ba inskrisaun jogadores, no mós rekizitu inskrisaun ba klubu nian, sei labele partisipa iha kompetisaun ofisiál sira ne'ebé Liga organiza.

Artigu 41.^º

Dívidas ba Liga

1. Molok atu hahú époka desportiva foun ida, Klubu sira tenki liquida (selu ona dívidas) débitu sira ne'ebé iha ho Liga.
2. Karik klubu sira la kumpre obrigasaun ne'ebé previstu iha número 1. iha leten, mak Sekretariadu Ezekutivu sei haruka notifikasi saun ida ba klubu sira ne'ebé ladauk selu, ho prazu ba pagamentu mak klubu sira, nafatin la liquida sira nia débitu (selu dívidas), automatikamente sai despromovidu ba kampeonatu iha eskalaun ne'ebé inferior, ka bele mós bandu labele tan partisipa iha kompetisaun ofisiál sira ne'ebé Liga organiza.

SEKSAUN II

Direitu no dever

Artigu 42.^º

Jogadores nia Direitu no Dever

1. Jogadores ne'ebé inskritu tuir regulamentu no iha akordu ba práтика desportiva ho klubu, mak bele partisipa iha jogu ofisiál sira ne'ebé Liga organiza.
2. Jogadores iha dever espesial atu:
 - a. Kumpri Lei Jugu no desizaun hosi ekipa arbitrajen;
 - b. Labele manifesta ka hatudu hahalok saida deit bainhira la konkorda ho ekipa arbitrajen nia desizaun;
 - c. Hatudu komportamentu ho lealdade no koresaun ba interviniente hothotu iha jogu laran, ba públiku no ba ema hotu ne'ebé hetan autórizasaun iha resintu jogu nian, tuir termu sira ne'ebé iha Regulamentu ida ne'e.

Artigu 43.^º

Liga nia apoio Formasaun Tékniku ba Klubus



1. Liga ho FFTL iha dever atu promove no fasilita Kursu Tékniku ba treinadór Futebol, ba masajista no ba atividade téknika hodi apoiu iha treinu, no ba jogadores nia formasaun.
2. Bainhira treinadór rua mak inskritu hosi klubu ida, ida uluk mak nu'udar treinadór prinsipal no ida fali nu'udar treinadór-adjuntu.

KAPÍTULU VI

INSTALASAUN DESPORTIVA

Artigu 44.^º

Indikasaun ba Estádiu

Jogu ne'ebé sura ba kompetisaun ofisiál sira ne'ebé Liga organiza, hala'o iha estádiu ne'ebé klubu hili, ka Liga mak hili, bainhira klubu sira ladauk iha estádiu, ka iha maibé la iha kondisaun ne'ebé Liga determina ba práтика desportiva.

Artigu 45.^º

Kolokasaun ba Publisidade

Klubu sira, nune'e mós Liga, bele promove publisidade, animasaun no sasan animasaun nian, ne'ebé deit mak hakarak, ba jogu sira ne'ebé nia organiza, maibé iha dever atu halo promosaun ba imajen no publisidade sira ne'ebé hosi Liga nia patrocinador ofisiál sira.

Artigu 46.^º

Harii Infra-Estrutura

Liga mak reprezenta klubu sira, promove ba Governu ho ba FFTL, apresenta nesesidade ba finansiamentu hodi harii resintu desportivu ne'ebé adekuadu ba práтика no dezenvolvimentu desportu no futebol iha Timor-Leste, hala'o negosiasaun no Kontratu-Programa ba implementasaun infra-estrutura, ka hodi tulun hadia infra-estrutura ruma.

KAPÍTULU VII



KONDISAUN TÉKNIKA NO SEGURANSA IHA ESTÁDIU

Artigu 47.^º

Kondisaun Téknika no Seguransa

Liga nia kna'ar atu dezenvolve dokumentu-baze ba resintu desportivu nian, hodi pratika futebol ho nia norma rasik ba seguransa no asesu ba públiku, no iha dever atu fahe ba Klubu sira, FFTL no ba Governu, hodi dinamiza dezenvolvimentu infra-estrutura no hodi implementa prosedimentu ba seguransa no kualidade ba realizasaun práтика futebol nian.

KAPÍTULU VIII

TRANSMISAUN TELEVIZIVA NO RADIOFÓNIKA

Artigu 48.^º

Titularidade ba Direitu

1. Liga mak na'in ba direitu televizivu hosi jogu ba kompetisaun sira ne'ebé nia organiza, bele negosia direitu televizivu ba kompetisaun ida-idak, tuir jogu, tuir kompetisaun, ka tuir faze sira kompetisaun nian.
2. Liga mak sei fahe tuir klubu sira ne'ebé inskritu ona iha 1^a no 2^a Divizaun Liga, parte kiik oan ida hosi direitu televizivu, liuhosi regulamentu ida ne'ebé sei aprova.
3. Liga mak define número transmisaun televiziva ne'ebé bele hala'o ba époka desportiva ida, ho obrigasaun atu fahe hanesan transmisaun jogu hosi klubu sira 1^a Divizaun Liga nian, ho kritériu tuir jogu nia relevánsia ba iha Kampeonatu.

Artigu 49.^º

Rezumu Televizivu

1. (Difuzau) Atu fó sai imajen hosi jogu ne'ebé hala'o tiha ona, depende ba autórizasaun ka lisensa prévia hosi Liga, liuhosi pagamentu ba taxa transmisaun nian ne'ebé kontratu ho Liga.
2. Kanal televizaun ne'ebé hetan ona direitu tansmisaun ba jogu refere, la inklui iha número 1. iha leten.



KAPÍTULU IX

ORGANIZASAUN FINANSEIRA BA JOGU

Artigu 50.^º

Kompeténsia

1. Organizasaun finanseira ba jogus kompetisaun ofisiál nian, iha Liga nia responsabilidade, bainhira klubu uma na'in sira ladauk iha estádiu ka kondisaun atu organiza jogus iha sira nia resintu (estádiu).
2. Bainhira Klubu sira ladauk iha resintu desportivu hodi hala'o jogus ba Liga, Liga mak defini fatin hodi hala'o jogu hosi kompetisaun sira ne'ebé Liga organiza.

Artigu 51.^º

Enkargu ba Deslokasaun

Enkargus (despezas) ba deslokasaun ekipa nian, iha jogus ne'ebé disputa tuir pontuasaun, nu'udar klubu sira nia responsabilidade; deslokasaun ba Regiaun Administrativa espesial Oe-Cússe Ambeno no Ataúro, mak presiza apoiu hosi Governu ho Liga, tuir termu sira ne'ebé sei defini.

Artigu 52.^º

Jogus ne'ebé hala'o iha Estádiu Neutru

Iha jogu sira ne'ebé hala'o iha estádiu neutru, klubu proprietáriu, ka arendatáriu iha direitu atu simu persentagem ida hosi reseita jogu nian, ne'ebé sei defini iha kontratu ho Liga, la sura ba estádiu sira ne'ebé partense ba entidade pública ruma.

Artigu 53.^º

Billete Nia Folin

1. Iha jogu hothotu hosi I Liga no II Liga nian, bele emitir billete hodi fa'an ba públiku, bainhira estádiu iha kapasidade ka tuir jogu ninia importânsia.



2. Klubu uma na'in nu'udar entidade organizadora mak hatu'ur folin billete ba públiku iha kordenasaun ho Liga, bainhira Liga mak organiza jogu Liga mak hatu'ur folin billete ba públiku.
3. Liga hetan 50% hosi valór billeteira bainhira organiza jogu, no fahe 30% ba klubu uma na'in, no 20% ba klubu bainaka.
4. Bainhira klubu uma na'in mak organiza jogu iha ninia estádiu rasik, sei fó fila ba Liga 25% hosi valór billeteira no fó 5% ba klubu bainaka.
5. Bainhira Liga mak organiza jogu ba Super Tasa ka ba final Tasa 12 de Novembru, reseita hosi billeteira fila 50% ba Liga no 25% ba klubu ida-idak.
6. Billete nia folin bele la hanesan, tuir zona ka fatin hosi estádiu refere.

Artigu 54.^º

Livre Ingressu

Liga ho FFTL nia membru dirijente sira, no mós dirijente arbitrajen nian, iha asesu livre ba resintu desportivu no ba jogus hothotu.

KAPÍTULU X

PROTESTU BA JOGU

Artigu 55.^º

Kompeténsia

Kompete ba Konsellu Jurisdicisional Liga nian, atu hatene no hola disizaun kona-ba reklamasaun jogu iha kompetisaun ofisiál sira ne'ebé Liga organiza, maibé órgaun disciplinar kompetente hosi FFTL mak iha responsabilidade foti desizaun ba rekursu sira.

Artigu 56.^º

Prosedimentu

1. Lala'ok no prosedimentu reklamasaun ba jogu sira iha kompetisaun ofisiál, husu legitimidade hosi parte sira ne'ebé interesadu, obriga atu hatama formatu reklamasaun



ihā prazu loron-lima (5) molok akontese faktu sira ne'ebé invoka, no fó dalan atu aprezença razaun no prova sira ne'ebé deit mak iha.

2. Bainhira Konsellu Jurisdicional la simu reklama saun, ho rekursu ba órgaun kompetente hosi FFTL, mak Sekretariadu Ezekutivu Liga nian sei ezekuta desizaun ne'ebé foti hosi órgaun FFTL nian, nu'udar prosedimentu ba rekursu reklama saun refere.

KAPÍTULU XI

KOMPETISAUN SIRA NE'EBÉ LIGA ORGANIZA

SEKSAUN I

Dispozisaun jerál

Artigu 57.^º

Estrutura Jurídika

Klubus ne'ebé partisipa iha I Divizaun no II Divizaun, sira nia obrigasaun atu harii estatutu ho organizasaun rasik nu'udar asosiasaun desportiva.

Artigu 58.^º

Prosedimentu

1. Klubus nia kandidatura atu partisipa iha kompetisaun sira ne'ebé Liga organiza (1^a no 2^a Divizaun), tenki kompletu ho dokumentu hotu ne'ebé Sekretariadu Ezekutivu husu, ho mós deklarasaun tuir modelu ofisiál ne'ebé Sekretariadu Ezekutivu Liga nian aprova, asina hosi Klubu nia reprezentante legal.
2. Klubu hothotu sai nu'udar membru (Asosiadu) iha Liga, ho direitu atu iha reprezentante ba órgaun Ezekutivu Liga nian, ho kbi'it atu ajuda eleje Liga nia Prezidente, no fó kbi'it ba Liga hodi defende klubu sira nia interese.

Artigu 59.^º

Rekursu kona-ba Inskrisaun klubu



1. Bainhira Sekretariadu Ezekutivu la simu klubu ida nia inskrisaun, klubu bele halo rekursu ba Órgaun kompetente hosi FFTL, iha prazu loron-lima (5) serbisu nian.
2. Rekerimentu ida atu bele simu, tenki fundamenta didiak no formula ho konkluzaun ba pedidu refere.
3. Karik klubu la simu desizaun hosi órgaun kompetente FFTL, klubu bele hatama rekursu liuhosi prosesu judisial.

Artigu 60.^º

Organizasaun Finanseira

1. Sai nu'udar enkargu (despeza) organizasaun finanseira iha jogu hothotu ba kompetisaun ne'ebé liga organiza:
 - a. Polisiamentu no seguransa;
 - b. Fiskalizasaun;
 - c. Despeza seluk.
2. Ba époka 2021 Klubu sira ne'ebé atu partisipa ba kompetisaun iha obrigasaun atu hatama iha Sekretariadu Ezekutivu Liga nian, to'o iha loron ~~20 fulan Outobru tinan 2020~~, taxa inskrisaun ho montante US\$???? (dolar amerikanu atus lima).
3. Ba époka 2021 Klubu sira ne'ebé atu partisipa ba kompetisaun iha obrigasaun atu depozita iha Sekretariadu Ezekutivu Liga nian, valór ida ho montante US\$????? (dolar amerikanu rihun rua), karik la depozita mak sei labele partisipa iha kompetisaun sira ne'ebé Liga organiza.

Artigu 61.^º

Promosaun no Degradasaun

1. Sei hetan promosaun ba 1^a Divizaun Liga iha époka desportiva tuir mai, klubu rua ne'ebé klasifika a'an iha primeiru no segundu lugar hosi tabela klasifikativa 2^a Divizaun Liga nian, ne'ebé kompleta rekizitu legal no tuir regulamentu ne'ebé estabelese ba kompetisaun.
2. Sei hetan degradasaun ba 2^a Divizaun Liga iha époka desportiva tuir mai, klubu rua ne'ebé hetan klasifikasaun ikus liu, iha tabela klasifikativa 1^a Divizaun Liga nian.



3. Karik klubu ida ka liuhosi klubu ida 2^a Divizaun Liga nian, tuir pontuasaun hetan direitu promosaun ba 1^a Divizaun Liga, la kompleta rekizitu legal no la tuir regulamentu ne'ebé estabelese ona, sei labele partisipa iha kompetisaun, hodi fó fatin fali ba klubu ka klubu sira seluk hosi 2^a Divizaun Liga nian, ne'ebé hetan klasifikasaun diak liu.
4. Karik klubu ida ka liuhosi klubu ida 1^a Divizaun Liga, mak la kompleta rekisitu legal no la tuir regulamentu ne'ebé estabelese ona ba kompetisaun, sei dezpromove ba 2^a Divizaun Liga ka esklui hosi kompetisaun, hodi fó fatin fali ba klubu sira hosi 2^a Divizaun Liga nian, ne'ebé hetan klasifikasaun diak liu iha époka ida liu ba.
5. Bainhira klubu ruma hosi 1^a Divizaun Liga mak hetan kastigu disciplinar hanesan dezklasifikasi, dezpromosaun ka eskuzaun hosi kompetisaun, sira nia fatin sei troka tuir termu sira iha número 4. iha leten.
6. Bainhira akontese kazu sira ne'ebé previstu iha número 1.2.3.4.5. mak la konsegue kompleta vaga sira ne'ebé iha, Sekretariadu Ezekutivu Liga nian bele deside hamenus número ekipas partisipantes.

Artigu 62.^o

Prémius

1. Ba klubu sira ne'ebé joga iha jogu ida 1^a Divizaun Liga, sei hetan prémiu ho osan ne'ebé Liga sei defini hanesan tuir mai:
 - a. Ekipa manan na'in sei simu prémiu ho valór ekivalente 70%.
 - b. Ekipa sira ne'ebé hetan resultadu empatadu, ida-idak sei simu prémiu ho valór ekivalente 50%.
 - c. Ekipa ne'ebé lakon sei simu prémiu ho valór ekivalente 30%.
2. Klubu ne'ebé manan 1^a Divizaun Liga simu prémiu ho valór \$15.000,00 dolar amerikanu.
3. Klubu ne'ebé manan 2^a Divizaun Liga simu prémiu ho valór \$10.000,00 dolar amerikanu.
4. Klubu ne'ebé manan Tasa 12 de Novembru sei simu prémiu ho valór \$15.000,00 dolar amerikanu.
5. Klubu ne'ebé manan Super Tasa sei simu prémiu ho valór \$15.000,00 dolar amerikanu.
6. Ba klubu manan na'in iha Liga nia Kompetisaun ofisiál sira, sei simu mós troféu ofisiál ida, tuir modelu ne'ebé sei hili hosi Sekretariadu Ezekutivu Liga nian.



7. Troféu ne'ebé temi iha leten, bele entrega kelas molok remata jogu ikus ne'ebé klubu sai kampeaun ba kompetisaun, biar jogu ida ne'e la'os jogu jornada ikus kompetisaun nian.
8. Jogadór sira ne'ebé joga hosi klubu manan na'in sei simu medalla ida-idak.
9. Sei fahe mós medalla seluk ba ajente desportivu sira tuir klubu manan na'in hatudu.

KAPÍTULU XII

IMPUGNASAUN

SEKSAUN I

Impugnasaun administrativa

SUB-SEKSAUN I

Generalidade

Artigu 63.^º

Impugnasaunun Gratuita

Desizaun sira ne'ebé Sekretariadu Ezekutivu no nia membru Liga ida-idak foti ka hasai bainhira la tuir regulamentu, bele hasoru reklamasaun administrativa no hasa'e rekursu ba órgaun kompetente FFTL nian, bazeia ba artigu sira ne'ebé regula hanesan tuir mai ne'e.

SUB-SEKSAUN II

Kontestasaun administrativa

Artigu 64.^º

Desizaun sira ne'ebé bele Kontesta (reklama)

1. Desizaun hothotu ne'ebé Sekretariadu Ezekutivu ka hosi nia membru sira ida-idak la tuir regulamentu, bele halo reklamasaun administrativa ba orgaun LIGA nian.
2. Bele hasoru reklamasaun ka rekursu ba desizaun sira ne'ebé foti ka hasai, tuir número 1. Artigu 66.^º, ne'ebé viola interese lezítimu interesado nian.



3. La sura hosi kazu sira ne'ebé hateten sai iha número 2. Artigu 66.º, karik desizaun sira ne'ebé la tuir regulamentu, bele apresenta nia fundamentu ba desizaun ne'ebé la aseita (simu).

Artigu 65.º

Natureza Jurídica

Reklamasaun administrativa sira ne'ebé regula iha artigu ida ne'e, ne'ebé iha nia natureza nesesáriu, bele hetan suspensaun ba desizaun ne'e nian, tanba hasoru hela rekursu administrativu.

Artigu 66.º

Efeitus

1. Reklamasaun ka rekursu administrativu sira ne'ebé regula iha artigu ida ne'e, suspende desizaun ne'ebé hasoru reklamasaun, la iha prejuízu ba saida mak hateten iha número sira tuir mai ne'e.
2. Simu tiha reklamasaun ka rekursu, reklamadu fundamenta nia razaun liuhosi despaxu fó fila reklamasaun ka rekursu ne'e, tanba la iha efeitu ba interesse públiku, iha prosesu organizasaun kompetisaun Liga nian.
3. Despaxu ne'ebé previstu iha número 2. iha leten, tenki notifika ba parte interesadu sira.

Artigu 67.º

Fundamentu ba Reklamasaun

Reklamasaun ka rekursu sira ne'ebé regula iha sub-seksaun ida ne'e, bele fundamenta nia ilegalidade hosi desizaun ne'e nian, ho nia sirkunstânsia seluk ne'ebé iha relasaun ho desizaun ne'e rasik.

Artigu 68.º

Rekursu



1. Rekursu sira bele hatama ho rekerimentu, haruka ba autór ne'ebé hasai desizaun, rekorente tenki fundamenta faktu sira ne'ebé sai hanesan motivu ba rekursu.
2. Rekerimentu ne'ebé hateten iha número 1. iha leten, rekorente bele apresenta dokumentu komprobativu hototu ne'ebé konsidera importante.
3. Rekorente tenki entrega nia rekursu iha serbisu administrativu Liga nian.

Artigu 69.^o

Prazu ba hatama Rekursu

Rekursu administrativu sira tenki hatama iha prazu loran-lima (5), sura hosi loran ne'ebé rekorente simu notifikasiadaun.

Artigu 70.^o

Prazu ba Desizaun

1. Reklamadu iha loran-sanulu (10) nia laran atu deside reklamasau ka rekursu administrativu.
2. Karik reklamasau ne'e iha natureza devolutivu (fó fila), prazu ba desizaun iha loran-lima (5) nia laran, sura hosi loran notifikasiadaun.

Artigu 71.^o

Deferimentu Tásitu (taka ona)

Rekursu administrativu sira sei la iha efeitu, bainhira liu tiha prazu previstu tuir artigu 72.^o.

SUB-SEKSAUN

FFTL ninia órgaun kompetente

Artigu 72.^o

Norma sira ne'ebé Aplika

Rekursu sira ne'ebé hatama ba Konsellu Ética no Disciplina FFLT hasoru desizaun Sekretariadu Ezekutivu ka membru sira ida-idak, regula tuir artigu sira tuir mai; no buat



ne’ebé la previstu iha regulamentu internu Konsellu Étika no Disciplina FFTL nian sei halo adaptasaun tuir Lei haruka.

Artigu 73.^º

Desizaun ne’ebé bele halo Rekursu

1. Desizaun sira ne’ebé Sekretariadu Ezekutivu ka nia membru sira ida-idak foti ka hasai la tuir regulamentu, bele hasoru rekursu ba Konsellu Étika no Disciplina FFTL, ho natureza administrativu.
2. Bele halo mós rekursu (impugnavéis) tuir saida mak hateten sai iha número 1. iha leten, karik desizaun ne’e fó prejuizu ba direitu no interesse lejítimu lezadu nian.
3. La sura ho kazu sira iha número 1. iha leten, karik mosu iregularidade (ilegalidade) iha desizaun sira ne’e, ne’ebé la altera ka fó impaktu ba desizaun ikus nian, fundamentu rekursu halo tuir prosedimentu ne’ebé previstu iha nº 1.

Artigu 74.^º

Espésie no natureza jurídika

Rekursu administrativu sira ne’ebé regula iha artigu ida ne’e, iha nia natureza nu’udar rekursu tutelar, tuir estatutu ne’ebé tutela iha Federasaun Futebol Timor-Leste nian no iha LFTL.

Artigu 75.^º

Efeitus

1. Rekursu administrativu sira ne’ebé regula iha artigu ida ne’e sei la muda desizaun dahuluk nian, la fó prejuízu ba saida mak regula iha número sira tuir mai.
2. Rekursu sei hetan efeitu suspensivu, wainhira desizaun sira ne’e implika diretamente ba klubu, ho situasaun sira hanesan tuir mai:
 - a. Desizaun ba rekursu depende hela ba klubu nia partisipasaun iha kompetisaun tuir eliminatória;
 - b. Desizaun rekursu depende hela ba kualifikasiasaun ba kompetisaun ka manutensaun iha kompetisaun ne’ebé sei disputa hela.



Artigu 76.^º

Fundamentu ba Rekursu

Rekursus ba Konsellu Ética no Disciplina FFTL, bele fundamenta deit razaun kona-ba irregularidade (ilegalidade) iha materia de direitu no materia de faktu.

Artigu 77.^º

Órgaun Rekursu nia Poder

1. Iha ámbitu ba rekursu sira ne'ebé regula iha kapítulu ida ne'e nian, Konsellu Ética no Disciplina FFTL mak sei deside tuir faktu no direitu.
2. Konsellu Ética no Disciplina FFTL nian hatene deit kona-ba kestaun sira ne'ebé rekorente ka rekordu apresenta ona, nu'udar objetu ba rekursu, la fó prejuízu ba kestaun sira ne'ebé la iha karáter ofisiál.
3. Konsellu Ética no Disciplina FFTL nian labele simu rekursu ba materia no faktu foun ka provas foun hosi rekorente, se'es hosi materia ne'ebé apresenta iha rekursu anterior, ne'ebé hato'o dahuluk iha orgaun rekordu (Liga).

Artigu 78.^º

Anulasau Rekursu

Bainhira simu tiha rekursu, Konsellu Ética no Disciplina FFTL nian iha kbi'it atu deside parsial ka totalmente ba desizaun ne'ebé foti uluk.

Artigu 79.^º

Rekursu nia Desizaun

1. Wainhira simu tiha rekursu, Konsellu Ética no Disciplina FFTL nian bele foti desizaun foun se'es hosi desizaun anterior.
2. Ba kazu sira ne'ebé previstu iha número 1. iha leten, ne'ebé desizaun ne'e definitivu (irecorrivel) ona, obrigatoriamente tenki kumpri hosi parte sira.



Artigu 80.^o

Legitimidade

1. Parte interviente sira ba Liga iha legitimidade atu ezerse sira nia direitu korforme saida mak hateten iha regulamentu ida ne'e.
2. Parte interviente sira ba Liga, ne'ebé simu ona desizaun rekursu ne'e nian, la iha ona dalan atu halo rekursu.

Artigu 81.^o

Rekursu ba Konsellu Ética no Disciplina FFTL

Rekorente sira sei hatama sira nia rekursu ba Konsellu Ética no Disciplina FFTL nian, bele hasoru rekursu tuir deit regulamentu jogu Liga no FFTL no lei ne'ebé vigente (aplicável).

Artigu 82.^o

Prazu ba Rekursu

Rekursu ba Konsellu Ética no Disciplina FFTL, sei hatama iha loran-sanulu (10) nia laran, iha loran hahú simu notifikasiadaun.

Artigu 83.^o

Tramitasaun (Prosedimentu)

Ba prosedimentu hothotu kona-ba prosessu disciplinar sei aplika deit tuir regulamentu Liga nian, ka halo tuir ba regulamentu FFTL no tuir Lei Prosedimentu Administrativu.

SEKSAUN II

Rekursu kontensiozu

Artigu 84.^o

Rekursu



Rekursu ne'ebé parte intervidente LFTL nian foti, hasoru desizaun administrativa ne'ebé efetua hosi Konsellu Ética no Disciplina FFTL nian. Tuir deit regulamentu LFTL, FFTL, no Lei Prosedimentu Administrativa nian.

KAPÍTULU XIII **DISPOZISAUN TRANZITÓRIA NO FINAL**

Artigu 85

Árbitu sira

Arbitrajen iha kompetisaun sira ne'ebé organiza husi LFTL nu'udar responsabilidade FFTL no Asosiasaun Arbitu sira ba Futebol. Nune'e, Asosiasaun Arbitu sira mak nu'udar órgaun normativu jogu Liga nian, nebe'e mai ho nia atribuisaun ka kompetênsia konforme regulamentu no estatutu rasik.

Artigu 86.^º

Konsellu Jurisdicional LFTL nian

Konsellu Jurisdicional mak nu'udar órgaun normativa étika no disciplina LFTL nian, ne'ebé mai ho nia atribuisaun konforme previstu iha regulamentu no nia estatutu rasik.

Artigu 87.^º

Tama iha Vigor

La sura ho dispozisaun tranzitória sira ne'ebé sei tuir mai, Regulamentu ida ne'e hahú vigora iha époka desportiva 2020-2021.